

四明叢書

張宗祥



勸忍百箴考註卷第二

元四明許名奎梓碧撰

明上竺釋覺徵 考註

怒之忍第二十六

怒爲東方之情而行陰賊之氣裂人心之大和激事物之乖異若火燄之不撲斯燎原之可畏

西漢翼奉字小君東海人治齊詩好律曆陰陽之占
元帝初卽位薦奉爲待詔上封事有曰臣聞之於師
治道務在知下之邪正知下之術在於六情十二律

而已北方之情好也好行貪狠甲子主之東方之情
怒也怒行陰賊亥卯主之貪狠必待陰賊而後動陰
賊必待貪狠而後用文多不備見翼奉傳○大和者
易稱保合大和本義謂陰陽會合沖和之氣蓋人秉
天地陰陽而生皆具此氣又喜怒人之性情皆不能
無者發而能中節中庸謂之和若怒之過當則有裂
壞心之和氣至于事物乖戾皆由所激而致然也故
大學曰心有所忿懣則不得其正○盤庚曰若火之
燎于原不可嚮邇其猶可撲滅

大則爲兵爲刑小則以鬪以爭太宗不能忍於蘊古祖
尙之戮高祖乃能忍於假王之請桀紂之稱

小四書人物蒙求曰小爭則訟大爭則兵○唐太宗
貞觀二年河內人李好德有心疾妄爲妖言詔大理
丞張蘊古按之蘊古奏好德實被疾有徵驗不當坐
治書權萬紀劾奏蘊古相州人好德之兄厚德爲其
刺史故蘊古阿意縱之按事不實上怒斬之於市後
爲魏徵所理上默然旣而悔之萬紀等皆有罪因詔
自今有死雖令卽決仍三覆奏乃行刑又本年太宗

以瀛州刺史盧祖尙才兼文武廉平公直徵入朝諭以交趾久不得人須卿鎮撫祖尙拜謝而出旣而悔之以疾辭上遣杜如晦等諭旨祖尙固辭上怒曰我使人不行何以爲政命斬於朝堂尋悔之他日魏徵語齊文宣帝除青州長史姚愷爲光州刺史不肯行文宣怒而責之對曰臣先任大州有勞無過更得小州所以不行文宣赦之太宗曰盧祖尙雖失人臣之義朕殺之亦爲大暴由此言之不如文宣矣卽命復其官蔭俱見史傳○漢高祖四年韓信使人言於漢

王曰齊僞詐多變反覆之國請爲假王以鎮之漢王
大怒罵曰吾困於此旦暮望汝來乃自反邪張良陳
平躡足附耳語曰漢方不利寧能禁信自王之乎不
如因而立之使自爲守不然變生王悟復罵曰大丈夫
定諸侯當爲眞王何以假爲遂立信爲齊王見本
傳○又漢相國蕭何言長安地狹上林中多空地請
令民得入田上怒曰相國多受賈人物爲請吾苑乃
下何廷尉械繫之數日王衛尉言於上曰夫事有便
於民而請之眞宰相事陛下何疑之淺也帝不懌卽

赦出之何年老素恭謹徒跣入謝帝曰相國爲民請
苑吾不許我不過爲桀紂主而相國爲賢相吾故繫
相國欲令百姓聞吾過也見本傳及高祖十二年鑑
呂后幾不忍於嫚書之罵調樊噲十萬之橫行嫚謀患切說文
侮易也

西漢惠帝二年匈奴冒頓方強爲書遺高后辭極褻
嫚后怒擬斬其使發兵擊之樊噲曰臣願得十萬眾
橫行匈奴中季布曰噲可斬也前匈奴圍高帝於平
城漢兵三十三萬噲爲上將軍不能解圍今妄言十

萬眾橫行是面諷也且夷狄禽獸得之善言不足喜得之惡言不足怒也后曰善令報書慈謝遺以車馬冒頓復使來謝曰未嘗聞中國禮義陛下幸而赦之因獻馬遂和親互見季布匈奴傳

故上怒而殘下下怒而犯上怒於國則干戈曰侵怒於

家則長幼道喪

長上聲喪去聲

夫在上之人凡事不能容忍而輒怒則殘虐於下猶高太之怒是也若在下之人不顧禮義而逞忿必有干犯於上如嫚書之罵是也○怒於國則干戈曰侵

者如孟子曰公孫衍張儀一怒而諸侯懼謂二人怒則說諸侯使相攻伐故諸侯懼則干戈日有侵伐之事又如楚怒秦誑商於之地而攻伐晉怒齊頃幃笑跛以興師之類也怒於家者如父子相夷兄弟鬩牆夫妻反目之類若如此則有喪失長幼之道也

所以聖人有忿思難之誠靖節有徒自傷之勸惟逆來而順受滿天下而無怨噫可不忍歟

難去聲

忿怒也難患難也魯論記孔子曰君子有九思其八曰忿思難謂人若有忿怒之時當思後有患難而懲

其忿以免他日之禍○靖節陶潛之號也潛號靖節先生有詩云怒氣劇炎火焚和徒自傷觸來勿與競事過心清涼○孟子曰有人於此其待我以橫逆則君子必自反也我必不仁也此不謂逆來而順受而何○孝經云言滿天下無口過行滿天下無怨惡

疾之忍第二十七

六氣之淫是生六疾慎於未萌乃眞藥石

左傳昭公元年晉侯有疾求醫於秦秦使醫和視之醫和曰天有六氣淫生六疾六氣陰陽風雨晦明也

過則爲菑陰淫寒疾陽淫熱疾風淫末疾雨淫腹疾
晦淫惑疾明淫心疾註云淫者過也末四肢也風過
則手足緩急晦者夜也晏寢過節則心惑亂明者晝
也思慮煩多則心成疾○藥草藥也石砭石也俱療
病之方物也人能防慎於未病之先猶勝治之於已
病之後備在下文

曾調攝之不謹致寒暑之爲釁藥治之而反疑巫眩之
而深信卒陷枉死之愚自背聖賢之訓釁許觀切
罅隙也
謂人嘗調理衣食之不節與持身之不謹致有風寒

暑熱因之以入而爲疾藥者聖賢品制以濟其天札
故愚者背藥而信巫終陷於枉死之鄉實違聖賢之
教宋鑑載江西俗尙鬼多爲巫覡所惑病者不服藥
而聽命於神時夏竦知洪州索部中得一千九百餘
家勒令還農毀其淫祠○史記扁鵲論病有曰病有
六不治驕恣不論於理一不治也輕身重財二不治
也衣食不能適三不治也陰陽并藏氣不定四不治
也形羸不能服藥五不治也信巫不信醫六不治也
有此一者則難治也見扁鵲傳

故有病則學乖崖移心之法未病則守嵇康養生之論
趙宋張詠字復之眞宗朝中進士第位工部尙書鎮
蜀嘗有李畋苦痞既瘳請謁公曰子於病中曾得移
心法否對曰未也公曰人能於病中移其心如對君
父畏之愼之靜久自愈乖崖者詠畫像自贊云乖則
違俗崖則絕物乖崖之名聊以表德見言行錄痞始
瘳切癰疾也○晉嵇康字叔夜恬靜寡欲寬簡有大
量拜中散大夫嘗著養生論以清虛靜泰少思寡欲
爲主有曰知名位之傷德故忽而不營識厚味之害

性故棄而弗顧曠然無憂患寧然無思慮又曰守之以一養之以和文多不備

勿待二豎之膏肓當思愛我之疾疢噫可不忍歟

疾恥切

熱病也肓呼光切

左傳成公十年晉侯景公病求醫于秦秦使醫緩爲之爲治也未至景公夢疾爲二豎子一曰彼良醫也懼

傷我焉逃之其一曰居肓之上膏之下若我何醫至曰疾不可爲也在肓之上膏之下攻之不可達之不及藥不至焉不可爲也公曰良醫也厚爲之禮而歸

公遂卒○左傳襄公二十三年魯季孫愛臧孫孟孫
惡臧孫及孟孫死臧孫曰季孫之愛我疾疢也孟孫
惡我藥石也美疢不如惡石夫石猶生我疢之美
其毒滋多孟孫死吾亡無日矣二人皆魯大夫備詳
惡忍

變之忍第二十八

志不懾者得於預備膽易奪者驚於猝至

易去聲猝麓沒切說文犬

從草暴出逐人也

懾者怯也懼也說苑叢談篇云兵不預定無以待敵

計不先慮無以應卒○宋史有云軍中有一范西域
聞之驚破膽范謂范仲淹

勇者能搏猛獸遇蜂蠆而卻走怒者能破和璧聞釜破

而失色

搏補各切手持也蠆丑
轄切蟲毒也蠆後曰蠆

東坡黠鼠賦云人能碎千金之璧而不能無失聲於
破釜能搏猛虎而不能無變色於蜂蠆○晉鄒湛對
武帝曰蜂蠆作於袖懷勇夫爲之驚駭猛獸在野荷
戈而出凡人能之見鄒湛傳○戰國秦昭王聞趙所
得楚卞和璧請以十五城易趙使藺相如奉璧往既

至秦無意償城相如怒髮衝冠卻立柱下曰臣頭與
璧俱碎禮而歸之爲上卿見本傳

桓溫一來坦之手板顛倒爰有謝安從容與之談笑

晉大司馬桓溫來朝孝武詔尙書謝安侍中王坦之
迎之新亭時都下洶洶云誅王謝坦之甚懼安神色
不動溫旣至百官拜於道側溫大陳兵衛延見朝士
坦之流汗沾衣倒執手板安從容就席謂溫曰安聞
諸侯有道守在四鄰明公何須壁後置人溫笑曰正
是不能不爾遂命撤之與安笑語移日見謝安傳及